

समे – 12:25 hrs.

<><><><><><>

Amit Shah Book on J&K Ladakh

केंद्री गृह मंत्री अमित शाह होर अज्ज नमीं दिल्ली च कश्मीर ते लद्दाख बारै इक कताब दे विमोचन आहले कार्यक्रमै च मुख परौहने दे तौर पर शामिल होडन। केंद्री शिक्षा मंत्री धर्मेन्द्र प्रधान बी इस मौके पर उत्थे मजूद रौहडन। 'जम्मू-कश्मीर एंड लद्दाख : थ्रू द एजेज़' कताब च जम्मू-कश्मीर ते लद्दाख दे त्रै जहार बरें दा इतिहास पेश कीता गेआ ऐ। एह कताब नेशनल बुक ट्रस्ट ते भारती ऐतिहासिक अनुसंधान परिषद दे सहयोग कन्नै हिन्दी ते अंग्रेजी दौने भाशाएं च प्रकाशित कीती गई ऐ।

<><><><><><>

Jaish Associate Arrested

पुलसै दक्खनी कश्मीर दे अवंतीपोरा च जैश-ए-मोहम्मद आतंकी संगठन लेई कम्म करने आले 4 जनें गी गिरफ्तार करी लैता ऐ। पुलस दा आखना ऐ जे गिरफ्तार कीते गेदे इनें लोकें दी पंछान त्राल पैयन दे रौहने आहले मुदस्सिर अहमद नायक वल्द फारूक अहमद नायक, कुचमुला दे वसनीक उमर नजीर शेख वल्द नजीर अहमद शेख, त्राल पैयन दे गे इनायत फिरदौस राथर वल्द फिरदौस अहमद राथर ते कौंसर बल त्राल दे बसनीक सलमान नजीर लोन वल्द नजीर अहमद लोन दे रूपै च कीती गई ऐ। उंदे कब्जे शा किश ऐतराजजोग सामग्री बी बरामद कीती गई ऐ। पुलसै दस्सेआ ऐ जे एह चवें जैश-ए-मोहम्मद

दे आतंकिएं गी आसरमा देने, सम्यान पुजाने ते असलाह वगैरा इक थाहरै दुई थाहर लेई जाने च मदद करदे हे।

<><><><><><>

Chief Justice Rabistan

केंद्र शासित प्रदेश जम्मू-कश्मीर ते लद्दाख दे बकख-बकख दिक्खभाल केंद्रें च रौहने आहले बच्चें लेई बेहतर दिक्खभाल ते सुरक्षा यकीनी बनाने दे मकसद कन्नै जम्मू-कश्मीर ते लद्दाख हाईकोर्ट दे मुख न्याधीश ते जम्मू-कश्मीर कनूनी सेवा प्रादयिकरण दे प्रमुख संरक्षक ताशी रबस्तान होरें कल जम्मू दे छन्नी रामा स्थित बाल निकेतन दा दौरा कीता। दौरे दौरान उनें उत्थे रौहने आहले बच्चें कन्नै गल्लबात कीती ते उनेंगी मठेयाइयां ते तोहफे बी तकसीम कीते। इस गल्लबात दौरान एह जानने च बी मदद थहोई जे उत्थे रवा करदे बच्चें गी केहड़ियां-केहड़ियां सुविधां उपलब्ध न ते उनेंगी होर केहड़िउएं चीजें जां सुविधाएं दी लोड़ ऐ। उनें बाल निकेतन दे कर्मचारिएं कन्नै बी गल्लबात कीती ते बच्चें दे पूरे-पराते विकास लेई बेहतर सुविधां ते उंदे नै बेहतर व्यवहार पर बी जोर दिता।

<><><><><><>

J&K-Yuva Survey

मुख सचिव अटल डुल्लू होरें कल मिशन युवा दी शुरुआत कीती। युवा उद्यमी विकास अभियान सरबन्धी एह मिशन समूचे केंद्र शासित प्रदेश च बेसलाइन सर्वेक्षण पर आधारित ऐ। श्रम ते रोजगार ते योजना विभागें आसेआ सांझे तौरा पर कीते जाने आहले इस सर्वेक्षण दा

उद्देश्य मजूदा उद्यमिण कोला प्रतिक्रिया हासल करना ते लगभग 1 लकख 37 जहार संभावित उद्यमिण दी पंछान करना ऐ। इस मौके अपने संबोधनै च मुख सचिव होरें इस सर्वेक्षण दे महत्वै पर लो पांदे होई आखेआ जे नौजवानें गी उद्यमता ते स्वरोजगार गी अपनी रोजी-रूटी ते कम्म रोजगार दे मौके दे रूपै च अपनाना लोड़चदा ते एह सर्वेक्षण उनेंगी इस्सै लेई तैयार करने दे मकसद कन्नै शुरू कीता गेआ ऐ। मुख सचिव होरें सरबन्धित मैहकमें गी आखेआ जे आह इस पूरे अभ्यास दी पूरी बकायदगी कन्नै निगरानी करन तां जे एहदी सटीकता गी यकीनी बनाया जाई सकै।

<><><><><><>

PM-Daljit

गायक ते अभिनेता दिलजीत दोसांझ होर कल नमी दिल्ली च प्रधानमंत्री नरेन्द्र मोदी होरेंगी जाइयै मिले। इक सोशल मीडिया पोस्ट च मोदी होरें आखेआ जे दिलजीत दोसांझ बहुमुखी प्रतिभा दे धनी न ते उंदी शख्सियत च प्रतिभा ते परंपरा दा बड़ा बधिया मेल मजूद ऐ। गायक दोसांझ होरें आखेआ जे ब' रे 2025 दी शुरूआत बड़ी खरी रेई ऐ ते प्रधानमंत्री हुंदे कन्नै बड़ी गै यादगार बैठक लग्गी जेहदे च संगीत सने नेकां विशें पर गल्लबात होई। इस मौके पर योग ते एहदे फायदें गी लेइयै बी गल्लबात कीती गई। दोसांझ होरें गलाया जे देश दी जातरा करदे होई उनेंगी मैहसूस होआ जे भारत गी आखर कीह इन्ना म्हान आखेआ जंदा ऐ। प्रधानमंत्री नरेन्द्र मोदी होरें आखेआ जे भारत दी सब्बनें शा म्हान शक्ति एहदा जीवंत समाज ऐ।

<><><><><><>

Bhaderwah Mysterious Death

डोडा जिले दे भद्रवाह च जंदी रातीं त्रै जनें संदिग्ध हालात च मरे दे पाए गे। भद्रवाह दे रायल इन नां दे इक गेस्ट हाउस च इंदियां लोथां थोने दे बाद कस्बे च डर त्राह आहला माहौल पैदा होई गेआ। इंदी पंछान जम्मू दे दमाना इलाके दे बसनीक 39 बरे दे मुकेश सिंह वल्द कुलदीप सिंह, एल्लै जम्मू दे पुरखू इलाके च रौहने आहले डोडा दे भलेसा इलाके दे बसनीक, 30 बरें दे आशुतोष वल्द दलीप रैणा ते सन्नी चौधरी दे तौर पर कीती गई ऐ। पुलसै दस्सेआ ऐ जे मामले दी जांच चलै करदी ऐ जेदे मुकम्मल होने पर गै पता लग्गी सकदा ऐ जे इंदी मौत दी वजह केहू ऐ।

<><><><><><>

Trains Delayed

समूलचे उत्तर भारत च जबरदस्त ठंड ते घनी धुंध दे चलदे आम जन-जीवन बुरी चाल्ली प्रभावित होआ करदा ऐ। घनी धुंध दे कारण दनांक छिंटे पर दिक्खने च औख आवा करदी ऐ जेदे चलदे केई रेल गड्डियां अपने तैय समें कोला चिरें ते बल्लें चलाइयां जा'रदियां न। रेलवे आसेआ दिती गेदी जानकारी मूजब दिल्ली पुज्जने आहिलियां 43 रेल गड्डियां 5 घंटे लेट आवा करदियां न। इंदे च पदमावत एक्सप्रेस, कालिंदी एक्सप्रेस, श्रमशक्ति एक्सप्रेस, महाबोधि एक्सप्रेस, आश्रय एक्सप्रेस, विक्रम शिला एक्सप्रेस ते कैफियत एक्सप्रेस शामिल न। उत्तर भारतीय इलाके च यात्रा करने आहले यात्रिएं गी सलाह दिती जंदी ऐ जे ओहू सफर पर निकलने कोला पैहले अपने सरबन्धित स्टेशनें परा गड्डी दे टैम बारै जानकारी हासल करी लैन।

<><><><><><>

Weather-J&K

मौसम विभाग नै औंदी 3 कोला 6 जनवरी तगर जम्मू-कश्मीर च मौसम दा मिजाज़ बिगड़ने, मैदानी इलाकें च हौली थमां दरम्याने दर्जे दी बरखा बरने ते उप्परले प्हाड़ी इलाकें च बर्फबारी दे असार दस्से न। विभाग मूजब 4 ते 5 जरवरी गी केई उच्चिएं थाहरें पर भारी बर्फबारी होई सकदी ऐ। यात्रिएं, सैलानिएं ते ट्रांसपोर्ट गी जिला प्रशासन ते ट्रैफिक मैहकमे आसेआ दिती गेदी हिदायतें दी पालमा करने लेई आखेआ गेआ ऐ।

<><><><><><>